

08 MAY 2002

Wakaf-Pengurusan

NEGARA ISLAM PERLU PERBAIKI PENGURUSAN HARTA WAKAF

KUALA LUMPUR, 8 Mei (Bernama) -- Nilai harta wakaf yang tinggi di kalangan negara-negara Islam perlu diuruskan dengan sempurna bagi memastikan kebajikan umat Islam yang memerlukan bantuan dapat disalurkan.

Menteri di Jabatan Perdana Menteri Datuk Abdul Hamid Zainal Abidin berkata bagaimanapun pengurusan harta wakaf oleh negara Islam masih perlu diperbaiki.

"Jika institusi wakaf dapat berjalan dengan baik seperti sepatutnya, tidak akan timbul kesusahan yang dihadapi di kalangan umat Islam," katanya pada sidang media pada akhir Persidangan Ketujuh Menteri-menteri Wakaf dan Hal Ehwal Islam di sini, hari ini.

Persidangan tiga hari bermula Isnin itu ditutup dengan rasminya oleh Menteri Hal Ehwal Islam, Dakwah dan Bimbingan Arab Saudi Al-Sheikh Saleh Abdul Aziz Mohammed Al-Sheikh di sini.

Semalam, Perdana Menteri Datuk Seri Dr Mahathir Mohamad menyampaikan ucap tama persidangan yang menegur umat Islam di seluruh dunia supaya tidak menyalahkan pihak lain atau Islam sendiri berikutan kelemahan yang mereka alami.

Abdul Hamid berkata pengurusan harta wakaf di negara ini diuruskan oleh institusi khusus di bawah kuasa Majlis Agama Islam Negeri.

Bagaimanapun, beliau tidak dapat menyatakan nilai sebenar harta wakaf yang terdapat di negara ini tetapi menurutnya nilai keseluruhan harta wakaf itu adalah "tidak sedikit."

Al-Sheikh Saleh Abdul Aziz, dalam ucapan penutupnya sebelum itu, menggesa negara-negara Islam meningkatkan pengurusan harta wakaf yang boleh dijadikan sumber pendapatan dan digunakan untuk membina sekolah, masjid dan jalan raya serta kebajikan umat Islam.

Selain itu, Abdul Hamid berkata negara-negara Islam juga perlu bertanggungjawab dalam memastikan fatwa-fatwa tidak dikeluarkan oleh sembarangan orang terutamanya yang tidak mempunyai kuasa mengeluarkannya.

"Fatwa tidak boleh dilakukan sembarangan orang terutamanya yang tidak ada kuasa, apalagi yang tidak berasaskan tujuan-tujuan syariah dan tidak ambil kira keadaan di satu-satu negara,"katanya.

--BERNAMA

RZS SNS MFJ NAK